



SAMOSTALNI SINDIKAT OSNOVNOG OBRAZOVANJA I ODGOJA
FEDERACIJE BOSNE I HERCEGOVINE

INDEPENDENT TRADE UNION OF PRIMARY SCHOOLS EDUCATION
OF THE FEDERATION OF BOSNIA AND HERZEGOVINA

Obala Kulina bana broj 1 71000 S A R A J E V O

Tel/fax: ++387 33 20 52 79 Tel/fax: ++387 33 21 32 56

E-mail: schools@bih.net.ba; schools1@bih.net.ba Web: www.sobih.ba

Transakcijski račun broj: 3389002206183142 UniCredit Bank Sarajevo;

Identifikacioni broj: 4200275500007 Porezni broj: 01075330

Broj: 01-803/16

Sarajevo, 6. juni/lipanj 2016. godine

- **SINDIKALNIM PODRUŽNICAMA
SAMOSTALNOG SINDIKATA OSNOVNOG
OBRAZOVANJA I ODGOJA
FEDERACIJE BOSNE I HERCEGOVINE**

Predmet: Informacija, dostavlja se

Poštovane kolegice i kolege,

Vlada Federacije Bosne i Hercegovine je dana, 13.05.2016. godine, bez upozorenja, konsultacija, inspekcijuskog nadzora ili bilo kakve komunikacije sa Samostalnim sindikatom osnovnog obrazovanja i odgoja Federacije Bosne i Hercegovine, donijela **Rješenje o oglašavanju ništavim rješenja o upisu u Registar udruženja Federacije Bosne i Hercegovine Samostalnog sindikata osnovnog obrazovanja i odgoja Federacije Bosne i Hercegovine, Akt broj: 06-05-218/2016 od 13.05.2016. godine.**

Na identičan način Federalno ministarstvo pravde je dana, 24.05.2016. godine donijelo **Rješenje kojim se Samostalni sindikat osnovnog obrazovanja i odgoja Federacije Bosne i Hercegovine briše iz Registra udruženja Federacije Bosne i Hercegovine, Akt broj: 03-05-2-1659/12.**

Formalni povod za donošenje ovakvih rješenja je inicijativa Samostalnog sindikata osnovnog obrazovanja i odgoja Kantona Sarajevo, za oglašavanjem ništavim Rješenja Federalnog ministarstva pravde o upisu u Registar Samostalnog sindikata osnovnog obrazovanja i odgoja Federacije Bosne i Hercegovine, Akt broj: 03-05-2-1659/12 od 29.01.2013. i Rješenja Federalnog ministarstva pravde, Akt broj: 03-05-2-1659/12 od 18.03.2013., te njegovo brisanje iz Registra udruženja Federacije Bosne i Hercegovine.

Samostalni sindikat osnovnog obrazovanja i odgoja Kantona Sarajevo je Sindikat koji je osnovan 2013. godine pod patronatom Vlade Kantona Sarajevo, sa ciljem da se „nepodobni“ Samostalni sindikat osnovnog obrazovanja i odgoja Federacije Bosne i Hercegovine zamijeni sa „kooperativnim“ Sindikatom, koji neće remetiti namjere Vlade Kantona Sarajevo, sa težnjom da se njegovo djelovanje proširiti na cijelu Federaciju Bosne i Hercegovine. Na čelo tog Sindikata je postavljena osoba sa političkim pedigreom (vijećnik u Općinskom vijeću, kandidat vladajuće stranke zastupnika u Skupštini Kantona Sarajevo i šta već još?) Koliko je ovaj Sindikat relevantan, govori činjenica da od svog osnivanja nije sakupio više od 36 članova. Najveći domet ovog Sindikata je bezrezervna podrška Vladi Federacije Bosne i Hercegovine, prilikom donošenja Zakona o radu, protiv kojeg su bili svi granski sindikati.

Pravi razlozi za donošenje ovakvih rješenja su sljedeći:

1. **Samostalni sindikat osnovnog obrazovanja i odgoja Federacije Bosne i Hercegovine je zauzeo stav da nije prihvatljivo umanjeње dostignutih prava zaposlenih u osnovnim školama, niti smanjenje broja zaposlenih, što je u suprotnosti sa stavom Premijera Vlade Federacije, koji je rezolutno izjavio „ili smanjenje plaća ili smanjenje broja zaposlenih“;**

2. Proglašavanjem nelegalnosti Samostalnog sindikata osnovnog obrazovanja i odgoja Federacije Bosne i Hercegovine, bi se analogno tome, proglasili nelegalni kolektivni ugovori za djelatnost osnovnog obrazovanja koje je zaključio ovaj Sindikat na nivou Federacije Bosne i Hercegovine i na nivou svih kantona/županija. Nakon toga sve pravomoćne i izvršne sudske presude bi pale, što bi Vladu amnestiralo od dugova prema zaposlenim u osnovnom obrazovanju po osnovu pravomoćnih i izvršnih sudskih presuda. Čak bi u tom slučaju teretili radnike za sudske i druge troškove i to bi pokušali naplatiti od naših, ionako malih plata;
3. Samostalni sindikat osnovnog obrazovanja i odgoja Federacije Bosne i Hercegovine je jedan od masovnijih i najorganizovanijih sindikata u Federaciji Bosne i Hercegovine koji zastupa interese oko 17.000 svojih članova, koji su obrazovani i koji imaju široko polje društvenog djelovanja (učenici, roditelji, lokalna zajednica ...), te su kao takvi potencijalna opasnost za buđenje svijesti građana. Njegovim gašenjem Vlada želi poslati poruku svim ostalim sindikatima što ih čeka ukoliko budu principijelni i istrajni u svojim zahtjevima;
4. Umjesto Samostalnog sindikata osnovnog obrazovanja i odgoja Federacije Bosne i Hercegovine treba instalirati „žuti“ sindikat i time poštedjeti vlade od svih eventualnih neugodnosti i realnih zahtjeva zaposlenih u obrazovanju, što će stvoriti lažnu i idiličnu sliku o simbiozi Vlade i Sindikata;
5. U rezervnoj varijanti, prisiliti zaposlene u osnovnom obrazovanju da sindikat registruju na svakom kantonu/županiji, te tako stvoriti više sindikata. Ovako male i rascjepkane sindikate je lakše kontrolisati, njima manipulirati i otupiti njihovo djelovanje.

Vlada Federacije Bosne i Hercegovine je na ovakav način najavila gašenje još 8 (osam) sindikata članica Saveza samostalnih sindikata Bosne i Hercegovine. Sljedeći sindikat kojem se ovo desilo je Sindikat BH pošte, što samo govori da se radi o političkom gašenju sindikalnog djelovanja, a ne o bilo kakvoj pravnoj argumentaciji.

U prilog ovoj tvrdnji navodimo slijedeće naše aktivnosti:

1. Sindikat je registrovan 1990. godine kod Višeg suda u Sarajevu (broj:R-II-58/90 od 17.07.1990. godine);
2. Prvi poslijeratni kongres je održan 05.07.1997. godine, nakon čega je Sindikat izvršio promjene u registraciji kod nadležnog registarskog organa;
3. Zbog osporavanja imena „Bosna i Hercegovina“ u samom nazivu Samostalnog sindikata vođena je dugogodišnja pravna borba, nakon čega su organi Samostalnog sindikata osnovnog obrazovanja i odgoja donijeli odluku i registraciju ovog Sindikata, sa izmjenjenim nazivom, izvršili na nivou Federacije Bosne i Hercegovine;
4. Nakon održavanja Osnivačke skupštine, sva potrebna dokumentacija za registraciju predana je Federalnom ministarstvu pravde, koje je u skladu sa Zakonom o udruženjima i fondacijama izdalo Rješenje o upisu u Registar udruga u Federaciji Bosne i Hercegovine „Samostalni sindikat osnovnog obrazovanja i odgoja Federacije Bosne i Hercegovine“ (Akt broj:03-05-2-1659/12 od 18.03.2013. godine i Akt broj: 03-05-2-1659/12 od 18.03.2013.godine);
5. Nakon više od tri godine Federalno ministarstvo pravde, koje je izdalo Rješenje o upisu u Registar udruga u Federaciji Bosne i Hercegovine, izdaje Rješenje o njegovom brisanju, što je apsurdno. Niko od odgovornih osoba Federalnog ministarstva pravde nije odgovoran za „navodne propuste“ pri registraciji;
6. Sve ove pravne radnje potrebne za registraciju izvršio je jedan od eminentnijih advokata u Bosni i Hercegovini, koji se smatra ekspertom za radno zakonodavstvo.

Šta smo poduzeli nakon ovakvog brutalnog pokušaja gašenja Sindikata?

1. Na našu inicijativu održana je sjednica Predsjedništva Glavnog odbora Saveza samostalnih sindikata Bosne i Hercegovine na kojoj nam je data puna podrška, te je donesena Odluka da do stavljanja van snage spornih rješenja, delegacija Saveza samostalnih sindikata Bosne i Hercegovine neće učestvovati u radu Ekonomsko-socijalnog vijeća za teritoriju Federacije Bosne i Hercegovine;
2. Izvršene su konsultacije sa više eminentnih advokata na području Federacije Bosne i Hercegovine, te su svi konstatovali da su sporna rješenja pravno neutemeljena;
3. Pravno mišljenje da je Vlada Federacije Bosne i Hercegovine ovim činom ozbiljno prekršila važeće zakonske propise i Međunarodne konvencije, koje imaju supermaciju nad domaćim zakonodavstvom, u pisanoj formi dao je ekspert za radno zakonodavstvo advokat Hakija Kurtović;
4. Savez samostalnih sindikata Bosne i Hercegovine se obratio Međunarodnoj organizaciji rada i Međunarodnoj konfederaciji sindikata, te ih informisao o administrativnom sprečavanju sindikalnog rada i djelovanja od strane Vlade Federacije Bosne i Hercegovine.

Generalni sekretar Međunarodne konfederacije sindikata sa sjedištem u Briselu je upozorio Fadila Novalića, premijera Vlade FBiH da nije prihvatljivo bilo kakvo, a pogotovo administrativno uskraćivanje sindikalnog organiziranja i djelovanja;

5. Samostalni sindikat osnovnog obrazovanja i odgoja Federacije Bosne i Hercegovine je pokrenuo upravni spor tužbom kod nadležnog suda radi poništenja Rješenja Vlade Federacije Bosne i Hercegovine o oglašavanju ništavim rješenja o registraciji Samostalnog sindikata osnovnog obrazovanja i odgoja Federacije Bosne i Hercegovine, te Rješenja Federalnog ministarstva pravde o brisanju Samostalnog sindikata osnovnog obrazovanja i odgoja Federacije Bosne i Hercegovine iz Registra udruženja Federacije Bosne i Hercegovine.

Građani Bosne i Hercegovine su dovedeni u vrlo teško i neodrživo stanje, koje bi se moglo nazvati stanje kontrolisanog haosa ili prigušene anarhije, što se može argumentovati sljedećim činjenicama:

1. U Bosni i Hercegovini se ne poštuje Ustav,
2. Ne poštuju se odluke Ustavnog suda Bosne i Hercegovine,
3. Ne poštuju se odluke Međunarodnog suda pravde,
4. Ne poštuju se Međunarodne konvencije koje u Ustavu Bosne i Hercegovine imaju supermaciju nad domaćim zakonodavstvom,
5. Vlasti u Bosni i Hercegovini ne poštuju zakone koje su sami donijeli, kolektivne ugovore koje su sami zaključili sa sindikatima,
6. Vlade u Bosni i Hercegovini donose i provode odluke koje su u suprotnosti sa zakonima i kolektivnim ugovorima,
7. Institucije države se zloupotrebljavaju sa ciljem sprječavanja udruživanja, javnog djelovanja, iskazivanja ličnog i grupnog interesa, ukazivanja na nepravdu, korupciju, nepotizam i sl.

Sve navedeno ne predstavlja nikakav problem za Vladu Federacije Bosne i Hercegovine, nego izmišlja pravne nebuloze kako bi eliminirala Sindikat i spriječila bilo kakav socijalni dijalog, kao pravnu stečevinu svakog demokratskog društva.

Bez obzira na ovakav nedemokratski i nasilnički pristup prema Sindikatu, nikakva Vlada, pa ni Vlada Federacije Bosne i Hercegovine, neće spriječiti zaposlene u osnovnom obrazovanju da javno, argumentovano i principijelno brane svoja prava.

Vlada Federacije Bosne i Hercegovine je ovim činom razbila iluziju svakom našem članu da bez Sindikata može ostvariti bilo koje pravo.

U ovom trenutku iskažimo jedinstvo, solidarnost, zajedništvo, međusobno povjerenje, jer jedino tako ćemo spasiti sebe i svoju djecu od modernog ropstva.

Napomena:

Zadužuju se povjerenici sindikalnih podružnica da do kraja školske godine održe sjednice sindikalnih podružnica i članove upoznaju sa ovim činjenicama.

Molimo Vas da sve konstruktivne prijedloge i sugestije u vezi sa daljima aktivnostima Sindikata u pisanoj formi dostavite kantonalnim/županijskim odborima.

Organi Samostalnog sindikata osnovnog obrazovanja i odgoja Federacije Bosne i Hercegovine će nastaviti da vode svaki vid aktivnosti u cilju nastavka rada i djelovanja kako bi zaštitili prava i interese svih naših članova.

S poštovanjem,

Dostavljeno:

- Naslovu
- Kantonalni/županijski odbori SSOIO FBIH
- Mediji
- a/a



PREDSJEDNIK

Selvedin Šatorović